

風振之洞神發音氣備九有和合萬靈使災
害不干萬真降庭天真皇人昔書其文以為
正音有知其音能齊而誦之者諸天皆建洞
神禳災萬福神王下觀其身書其功勳上奏
諸天萬神朝禮地祇侍門大敷魔王保舉上

真道備冠得遊行三界昇入金門

此音無所不辟無所不禳無所不度無所不
成天真自然之音也故誦之致飛天下觀上
帝遙唱萬神朝禮三界侍軒群杖束首鬼精
自亡琳琅振響十方肅清河海靜默山嶽吞
烟萬靈振伏招集群仙天無氛穢地無枝塵
冥慧洞清大景玄玄也

元始无量度人上品妙經卷之四十四

靈寶无量度人上品妙經卷之四十五

解穰山谷瘴癘品

道言昔於浩舒天中遂碧幽歌大神樂土受
元始度人解穰山谷瘴癘妙品元始天尊當
說是經周迴十過以召十方始當詣座天真

大神上聖高尊妙行真人大小山谷仙官主
宰十方國土列嶽群仙溪谷泉源鬼神令長
直年方域行瘴為癘神官曹屬部隸彼司无
鞅數衆乘空而來從山現出紫輶碧輿飛雲
輝映寶輪羽蓋扶華垂簾流明玉光千色逆
勃朗耀玄虛七日七夜諸天日月星宿樞衡
玉關駐景停輪神風靜默山谷藏雲天鑑鮮
瑩和氣八濤一國地土山川林木緬平一等
无復高下土皆作藥珠含碧溫明之玉无有
異色衆真侍座元始天尊玄坐空浮九靈夜
光萬峰承景瓊臺之上說經一徧諸天大聖
同時稱善是時三萬六千山嶽一時開明說
經二徧玄霜洒空靈芝盤鬱說經三徧祥煙
普覆岩實生香說經四徧世境肅清山雲吐
秀說經五徧龍光照海天寶凝華說經六徧

道炁照蘇群生怡悅說經七徧鬼魔潛伏瘴
癘捐消說經八徧天谷虛玄神煙鬱揚說經
九徧三真俯應妙瑞告玄說經十徧化洽窮
夷天人稱嘆是時一國是男是女莫不傾心
皆受護度咸得長生

道言是時元始天尊說經一徧東方真賢世
界无極國土解穰山谷瘴癘大神无鞅之衆
升空而至說經二徧南方慧觀世界无極國
土解穰山谷瘴癘大神无鞅之衆升空而至
說經三徧西方定仙世界无極國土解穰山
谷瘴癘大神无鞅之衆升空而至說經四徧
北方常善世界无極國土解穰山谷瘴癘大
神无鞅之衆升空而至說經五徧東北明微
世界无極國土解穰山谷瘴癘大神无鞅之
衆升空而至說經六徧東南靈德世界无極
國土解穰山谷瘴癘大神无鞅之衆升空而
至說經七徧西南海靜世界无極國土解穰
山谷瘴癘大神无鞅之衆升空而至說經八
徧西北元皇世界无極國土解穰山谷瘴癘
大神无鞅之衆升空而至說經九徧上方洞

虛世界无極國土解穰山谷瘴癘大神无執之衆升空而至說經十徧下方通光世界无極國土解穰山谷瘴癘大神无執之衆升空而至十徧周竟十方世界无極國土解穰山谷瘴癘大神一時同至一國男女傾心歸仰求請天尊以大慈力普為下元十方世界无極生類解穰山谷瘴癘保命全形演說普天山嶽洞谷幽墟有諸鬼神藏匿遁泊與諸惡毒御命之衆聚結黨屬施行毒炁瘴癘生民无始神文收攝解除毒害永消是時仙真來者雲集兩飛駢羅圍繞无執之衆迺國一半土皆徧陷非可禁止於是无始凝眸垂睇遍覽國土緩振玉音徧告大衆混黃立極萬象同生故有三萬六千天地三萬六千日月又有大三千世界中三千世界小三千世界一

冒世間世間男女依近山谷呼吸飲吞納受其邪構為瘴癘以至天傷禍殆境邑我以法慈出示神符解穰之法使世間生民獲養安和修行得道大衆稱讚各願聽聞无始既與妙教懸一寶珠大如黍米在空玄之中去地五丈无始登引天真大神上聖高尊妙行真人十方无極世界國土解穰山谷瘴癘大神无執數衆俱入寶珠之中天人仰看唯見勃勃從珠口中入既入珠口不知所

在國人廓散地還平正无復歌陷无始即於寶珠之內說經都竟真真監度以授於我當此之時喜慶難言法事粗悉諸天復位修歎之間寂无遺響是時天人過值經法普得濟度全其本无有中傷傾土歸仰咸行善心不邪不妄不恣不逸不驕不吝不說不隨不誑不惑言止淳正體貌雍容齊同安泰異骨成親國安民康欣樂太平經始出教一國以道預有至誠宗奉禮敬皆得度世

道言元始天尊說經中所言並是諸天上帝內名隱顯之音亦是真王內諱解穰山谷瘴癘百靈之隱名也非世之常辭上聖已成真人通玄究微禁教山谷行瘴為癘毒惡鬼神解脫禍因厭穰疾害保濟生民能悉其章誦之十過諸天遙唱北帝設禮鬼神攝毒山谷藏雲瘴癘不行兆民清安群魔束形鬼精滅莫回屍起死白骨成人至學之士誦之十過則五帝侍衛三界稽首魔精喪眼鬼祇滅莫濟度垂死絕而得生所以爾者學士模真山谷與道玄同不假解穰自无瘴癘若穢氣未消體未洞真以制十方威未制天政德可伏御地板束縛魔靈解穰瘴癘存救世人但却疾而已不能長生輕誦此章身則被殃供養尊禮門戶興隆世世昌熾與善因緣萬災不干神明護門斯經尊妙福慧自然度人无量為濟物之宗魏巍大範德難可勝

道言凡誦是經十過十方解穰山谷瘴癘大神齊到毒惡之炁大小蟲虻噴吐惡烟除害生民殘傷物命誦此洞文瘴癘消滅十方山谷總屬瘴癘之神有七仙童子奏事童子十二年王七十二候統靈癘仙師掌病仙母主

瘴癘歐陽神君華仙郭師君張師君鍾師君李師君白師君統兵行瘴病鬼神帥邵侯欽聞帝勅急為收攝毒炁山谷惡精解謝積世傳注穰辟災答立離兆身長生降其福祿永年清淨通靈衆神護衛如符所勅病炁蠲釋而好學至經功滿德就皆得神仙飛昇金闕遊宴玉京也上學之士修誦是經山谷之邪世間瘟疫不敢為害神炁充全皆即受度飛昇南宮世人受誦則延壽長年後皆得作尸解之道魂神整滅不經地獄即得返形遊行太空此經微妙普度无窮一切天人莫不受慶无量之福生死蒙惠上天所寶不傳下世至士齋金寶效心盟天而傳輕泄漏慢殃及九祖長役鬼官侍經五帝玉童玉女各二十四人營衛神文保護受經者身

冬行山谷瘴癘不得染注生人為國土帝主安鎮國祚保天長存世世不絕常為人君安鎮其方民稱太平八節之日誦誦是經解穰時行山谷瘴癘不得染注生人得為九宮真人本命之日誦誦是經解穰山谷瘴癘不得於本命刑害衝破死敗之日染傳毒炁殃注此身魂神澄正萬炁長存不經苦惱身有光明三界侍衛五帝司迎萬神朝禮名書上天功滿德就飛昇上清

徑御
无上三十二天元始上帝至尊几前
引系三十二過東向誦經

元始无量度人上品妙經
元始洞玄靈寶本章解穰山谷瘴癘妙品十方度人勅魔陽韻冥合自然其炁妙祖虛无上玄元始之炁寶液凝華植立天地山嶽洞宮樓烈萬神握御元網經營造化順育生靈陰陽乘沙生積妖雲毒精結體以造魔群蛇巨蝮癘鬼之精八山四嶽隱穴幽墟乘其正炁騰化邪氛肆其酷毒傷害衆民為瘴為癘无以蕩除靈寶上道洞玄真文攝召統制永保肅清无文不光无文不明无文不立无文不成无文不度无文不生是為大梵神妙之機鬱羅蕭臺玉山上京上極无上大羅玉清渺渺劫刃若亡若存三華離便大有妙庭金闕玉房森羅淨密輪旋大細範圍十方中有解穰山谷瘴癘之神中有清淨萬福天君

中有衛世吉祥大神中有无極保命丈人中
 有南上蕩妖滅注廷壽益算度厄尊神迴骸
 起死无量度人今日校錄諸天臨軒
 東方无極攝毒神王長生大聖无量度人
 南方无極葆真神王長生大聖无量度人
 西方无極破邪神王長生大聖无量度人
 北方无極靜天神王長生大聖无量度人
 東北无極辟禍神王長生大聖无量度人
 東南无極祛瘴神王長生大聖无量度人
 西南无極消癘神王長生大聖无量度人
 西北无極制妖神王長生大聖无量度人
 上方无極固命神王長生大聖无量度人
 下方无極護身神王長生大聖无量度人
 十方解懷山谷癘癘神王長生度世无量大
 神並乘寶雲紫琳玉瑩碧鳳神輿纏憶雕輪
 駉駕玄虎五色黃龍建九天之節八素靈幡
 前蕭洞章齊唱後歌隱韻同音獅子白鶴嘯
 歌電電仙御啓途五老翼轅德乘萬騎浮空
 而來傾光回駕監真度世九地土皇五嶽上
 公九州社令四瀆神王解懷瘴癘疾厄大神

執籙把籙齋到帝前隨所應度嚴校諸天普
 告三界无極神鄉山谷之府四面八方三萬
 六千大小之山潛穴幽谷岩壑溪源上解鬱
 伏五行不正之炁寒溫乖沴之邪遽合鬼異
 蒸發雲烟隨人呼吸傷害間關外薄肌膚侵
 擾內真寒如冰凜熱如火燭形負萬苦神意
 哀冤急為豫除速付三官不得息縱逼合生
 靈元始符命敢有稽延天師將吏部衛形魄
 勿使惡毒枉致暴殘普世蒙惠福慶自然生
 身受度劫劫長存永無災患與天齊年過度
 三災五苦八難超渡三界逍遙上清上清之
 天天帝玄真无色之境梵行
 東方八天
 靖明通化天 帝景齊文
 普曜絕真天 帝昌嘉久隆
 生開悅感思皇天 帝曜正尊
 洞空濟澤昭隨天 帝驕持屍危
 奔中理神淨化天 帝論祁允多
 虛德紀章天 帝保真自宜
 道思歎玄天 帝覺子湘

獻迪蒙示天 帝伯越師昂
 南方八天
 王除正强天 帝班何子卿
 果寂思微天 帝道伯靈
 都瓊明玄講化天 帝玉賢公梁
 章化夷德天 帝滋季師明
 慧觀曜空天 帝勃雷九莊
 太微妙宗極義天 帝延岐保靈
 端靖存華天 帝尚孝恭
 仙曆總真平功天 帝仲玦宜坤
 西方八天
 濟玄真和天 帝黃幸慈
 太上變炁天 帝諒伯上玄
 醉化舉仙天 帝千梁曜
 角道生光天 帝湛扁羅強
 梵寶招靈用修天 帝確覺真
 鬱淵景慶天 帝鎮微次霞
 叢陽絳英天 帝高玄陽
 瓊度力房天 帝正虞兆先
 北方八天


玄靈七真天 帝班序正析
 慶玄宛縮天 帝魯方踏審
 校靈議溥天 帝澤路龍符
 斗籍變魂升真天 帝優管黨無
 保仙順解理明天 帝混道開

初皇元首玉機天 帝賢資漸容
 八道隱玄藏微天 帝朝侯左還
 太素龍景逸王天 帝烈修洞休


三十二天三十二帝諸天隱諱諸天隱名天
 中空洞自然靈章諸天隱韻天中之音天中
 之尊天中之神天中大魔天中之靈九和十
 合變化上清无量之奧深不可詳數落神真
 普度天人今日解穰瘴癘擒攝妖氛請消殃
 怪誅伐禍根剷除疾橫上奏玉玄真王護度
 塞絕死門東皇誠毒西帝錄精北君淨穢南
 真衛形中皇太一司領化權調運正炁蕩辟
 魔烟青帝布和白帝安爾赤帝激炎黑帝潤
 澤黃帝總生无今天開青山魔王拘飛運格
 赤山魔王擊殃禦惡白山魔王鋒揮巨勅黑
 山魔王撫烈捍戡黃山魔王董威利翼五山

大魔攝毒之神各司將吏億萬之兵操戈揚
 魔祛掃不祥拱輔玄化與道齊功上天度人
 奕闡真風神森不作妙化澄清萬種孽類肅
 殺成塵黑溪曠野下逮幽陰夔魑魍魎血食
 之寘膏鼓秋力乘負邪津流鈴震腦金錢戮
 形元始告命敢有稍停癘魔喪迹瘴毒滅氛
 三官北鄰明檢鬼營不得容隱金馬驛呈普
 告无窮萬神咸聽三界五帝列言上清


辟山谷瘴癘佩符錄靈風朱書白書三五大小通用




朱書辟山谷瘴癘貼臥處



二



朱書辟山谷瘴癘符安不五中



朱書辟山谷瘴癘符安不五中

天元之始萬劫之先渺渺相初混沌玄黃疑
 精結有融植乾坤陰陽升降四序推行中有
 診炁化成毒精毒精之母號曰栢仙噬炁魚
 木吸潤枯東造為瘴癘冥晦遊天形為毒鳥
 九頭相連聲如啼吸周行八山人觸其形病
 注羸每天實妙帝鎮伏邪源號曰赤靈被丹
 中金威用无邊救護世人摧敗強拜召迎冲
 炁安禱元元太平開國運度自然元始安鎮
 數落五篇亦書玉字八威龍文保制病魔使
 命長存封山禁谷瘴癘不生梵炁彌羅萬範

開張元網流演三十二天輪轉元色周回十方旋鬼歷心迴度八山三十六洞繞悉上元八景冥合悉入三玄玄中太皇上帝高真汎景紫雲嘯詠洞章金真朗郁流響雲營玉符攝悉柶風聚烟紫虛鬱秀輔翼萬仙巨山神

歌金虎獲天咬食瘴癘冲和自然天地康泰和合歸真真中有神青華帝君太始青炁來降下元兆民長生病无毒艱仙卿輔相真妃侍軒叔火玄父擁衛華晨執符把籙保命生根上遊上清出入雲房八冥之内細微之中下鎮人身泥丸絳宮中理五炁混合百神十轉回靈萬炁齊仙仙道貴生无量度人地戶天門日車月輪隨道正炁救病得生山谷惡注穰解永錫保度得生上聞諸天諸天之上各有生門中有空洞謠歌之章真王靈篇妙化玉文

第一解穰山谷瘴癘之音
高上眇眇 神用无涯 御正炁子
獨蕩百邪 正炁衛生 邪正醜殘
魔毒既滅迹 怪孽熄其源 妖氛害我真

乖沓相纏綿 消魔玉清王 妙範却百病
靈音鎮山岳 琅琅招太和 散攝禍根源
瘴癘亦无餘 噫嗟爾兆身 未識玄中歌
天橫喪其軀 哀冤將奈何 不遇空洞音
焉能脫世羅

第二解穰靈威之章
四炁无霧 萬禍滅連 瘴癘毒妖
鬼莽邪烟 神符驅向 威虛輝煌
諸天大聖 總御騰躍 握鈴儀節
掃絕不祥 肅清十界 氛穢除蕩
遠殃疾子 安泰自然 身度此難
无量玄恩 此其樂子 賴我生存
和炁蕩蕩 與道合真 靈寶上法
元始玉文 无所不禳 无所不解
保度无窮 為世津梁 恐爾未悟
設此歌章

第三解穰降真指靈歌曰
朗朗高晨 煥耀玉都 布令千真
總統萬魔 神金虛章 制召眾靈
部衛世化 闡我明科 有崇我教

遂保長年 災橫莫干 晏躬无虞
上聖哀憐 出此玉書 消除苦毒
我道不愆 正道好生 邪道天殘
遵我正道 以合我真 正道常固
疾禍无侵 若不知此道 何以感百神

神威鎮八方 上德長日新
此三界之上飛空之中真王歌音音參洞章
誦之百徧瘴孽消除誦之千徧邪癘不生萬
徧道備普護長年過度三界位列仙真有聞
靈音五嶽衛形敷制地祇侍衛送迎拔出禍
難解穰不持七祖升遷永離北山竟度朱陵
受鍊更生是謂无量普度无窮有秘上天文
諸天共所崇世慢墮地獄禍及七祖翁
道言此二章並是諸天上帝及至靈真王隱
秘之音解穰山谷之邪合雜鬼神異惡蟲蠱
四時不常之炁以為瘴癘輕病一家重症一
鄉州城聚落以至天下上聖哀憫出顯符章
解穰之法救護生民皆是大梵之言非世上
常辭言无韻麗曲无華宛故謂玄典難可尋
詳上天所寶秘於神霄玉清王府東華經室

詳上天所寶秘於神霄玉清王府東華經室

歲曆壬辰應運下傳若有至人齋金寶質心
依舊格告盟真玉然後而付焉

道言夫山谷之悉險易不同高下不等寒濕
不均蒸之所至先後不時高則多寒下則多
濕溫蟲不蟄流水不冰毒蛇異物乘蒸鼓邪
金石燥濕鬱蒸成烟游魂厲鬼浮行其間觸
冒生人以爲疾患上聖神人示以解禳二法
若病蒸方熾井邑流行則宜淨心修齋行香
服佩符章以解之又以朱書大梵隱語燒灰
着清水之中偏令飲之无不寧息若歲蒸夫
宜或涉履山谷預爲禳備之法則於所居之
方爲壇醮祭十二年王山谷行病五方天使
邵侯神君內外施符五方安瓶以桃柳香艾
竹葉煎水貯於瓶內大小隨時飲之或以沐
浴又以大梵隱文朱書隨方安之即瘴癘消
散鄉邑又安六時行香十徧轉經福德立降
消諸不祥无量之文普度无窮

神運上南宮隨其學功計日而得更生轉輪
不惑便得神仙

道言夫陰陽乖否亦當修齋行香誦經禳癘
爲怨疫毒流行亦當修齋行香誦經除靈肆
酷擾害生民亦當修齋行香誦經破除陰怪
侵犯正真亦當修齋行香誦經召集吉祥安
鎮家門亦當修齋行香誦經夫齋戒誦經功
德甚重上消天災下樓毒害以度兆民生死
受賴其福難勝故曰无量普度天人
道言凡有是經能爲一切兆民行是功德有
災之日發心修齋燒香誦經十過皆諸天記
名萬神侍衛右別至人尅得爲聖君金闕之
臣諸天記人功過毫分无失天中真正亦保
舉爾身得道者乃當洞明至言也
諸天中大梵隱語无量之音 道君撰
元始靈書解禳山谷瘴癘玉篇

東方八天

桓精山佳 鵬雲穴雞 董猫魁蛛
殺真乾雷 桃鬼枯柳 月芝渠師
道寂胡蟬 馬符蛟非 剪沙岩書

虎蟻流丹 土蛇周剛 遙文教爐
化感夢仙 趙邵總靈 氣洵海區
性逐時號

南方八天

杜侯伯元 南府三師 勉凶移毒
老父溪龍 崑鉤璉俞 佐閻池蒙
攝命符令 轉火奔風 屍牢鎖伏
太空極雄 依出恍成 化石廣功
操枝運靈 察景殺童 道遊天霞
救岸已春

西方八天

崔杜監驅 急攝縞女 秦蘭丙垂
幽寶竟東 育典秋聖 欽持決容
茂果逸回 汶靈夜中 馬玄離遜
雲鄉耿漢 殿合建孤 明璵敏神
昆蘆蒼機 淪藻品昧 靜獨荒詛
走阮夷陵

北方八天

真勒陀妻 饒珠擊門 左太皇辰
牛奎浮瓊 去宮子仙 羅聰變玄

波霧充石 何庚竊宜 司饑那侯
錄刺捨修 泉合洞識 赤天瀧由
定驛蓮毒 斬截橫鉤 犯洛憂明
鄧官蟬旒

道言此諸天中大梵隱語无量之音書文刻
書闕風玄臺以却萬惡不惟解穰山谷瘴癘
一切邪病鬼神為官依法教之无不立驗字
皆廣長一文天真皇人昔書其文以為正音
有知其音能齋而誦之者諸天皆遣十方神
王下觀其身書其功勳上奏諸天萬神朝禮
地祇侍門流傳此經普救世人治病除邪消
却禍災大勳真王保舉土清道備尅得遊行
三界升入金門此音无所不辟无所不獲无
所不度无所不成天真自然之音也故誦之
致十方下觀上帝遙唱萬神朝禮三界侍軒
群妖束首鬼精自亡琳琅振響十方肅清河
海靜點山岳吞烟萬靈振伏招集群仙天无
氛穢地无妖塵冥慧洞清大量玄玄也
元始无量度人上品妙經卷之四十五

靈寶无量度人上品妙經卷之四十六 字

除穰水火漂焚品

道言昔於靜樂天中飛青窠歌大无量土受
元始度人除穰水火漂焚妙品元始天尊當
說是經周回十過以召十方始當詣座天真
大神上聖高尊水火二司大將仙君將軍吏
兵行水發火官曹掾吏度厄拔難真人无鞅
數衆乘空而來紅黑奔雲虎與甲馬黃麾絳
節翠葆朱幡疾雷沸天雄風偃嶽異彩祥光
縹緲鬱勃洞煥太空七日七夜諸天宮鑰震
鳴殿觀傾動日月星辰靈芒噴射輝煌傳輪
仙梵佇雲迴霞繞斗碧影輕泛紫烟結樓一
國地土山川林木緬平一等无復高下土皆
作蒼玉无有異色衆真侍座
元始天尊玄坐空浮五色自然飛仙十華之
座說經一編諸天大聖同時稱善是時一國
男女受福諸天常樂道化說經二編太微紫
微水火二曹奏功紀德陰陽調平說經三編
日帝奉笏月后致恭說經四編二曜三元咸
來稟命說經五編水母運機延劫永世火官

布算增曆益年說經六編考罰得宜无有橫
枉說經七編漂焚息苦燒溺業消說經八編
三界晏安不生驚擾說經九編地鎮天靈飛
伏合倫說經十編厄運俱濟人物又寧是時
一國是男是女莫不傾心皆受度度咸得長
生

道言是時元始天尊說經一編東方无極无
量品水火司功大神无鞅之衆浮空而至說
經二編南方无極无量品水火司察大神无
鞅之衆浮空而至說經三編西方无極无量
品水火司罰大神无鞅之衆浮空而至說經
四編北方无極无量品水火司直大神无鞅
之衆浮空而至說經五編東北无極无量品
水火司厄大神无鞅之衆浮空而至說經六
編東南无極无量品水火司令大神无鞅之
衆浮空而至說經七編西南无極无量品水
火司錄大神无鞅之衆浮空而至說經八編
西北无極无量品水火司禁大神无鞅之衆
浮空而至說經九編上方无極无量品水火
司命大神无鞅之衆浮空而至說經十編下